

საქართველოს უზენაესი სასამართლოს მოსამართლის თანამდებობაზე ასარჩევად საქართველოს პარლამენტისათვის წარსადგენი სამოსამართლო გამოცდილების მქონე მოსამართლეობის კანდიდატის შეფასების ფორმა

მოსამართლეობის კანდიდატის ლაშა ქობიაშვილის შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	<input checked="" type="checkbox"/>	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	17	20
სამართლებრივი დასაბუთების უნარი და კომპეტენცია	16	20
წერის უნარი	16	20
ზეპირი კომუნიკაციის უნარი	14	15
პროფესიული თვისებები, მათ შორის, ქცევა სასამართლო დარბაზში	14	15
აკადემიური მიღწევები და პროფესიული წვრთნა	4	5
პროფესიული აქტივობები	4	5
ქულათა ჯამი	85	100

სახელი, გვარი: ირმა გელაშვილი

თარიღი:

*ი. თაყაი*

28.05.2021

საქართველოს იუსტიციის უმაღლესი საბჭოს 2020 წლის 7 ოქტომბრის N1/134 გადაწყვეტილებით გამოცხადებულ საქართველოს უზენაესი სასამართლოს მოსამართლეობის კანდიდატთა შესარჩევ კონკურსში მონაწილე კანდიდატის

**ლაშა ქოჩიაშვილის**

**შეფასება/დასაბუთება**

კანდიდატის შეფასებისას ვიხელმძღვანელებ „საერთო სასამართლოების შესახებ“ საქართველოს ორგანული კანონის 34<sup>1</sup> მუხლის მე-11 პუნქტით დადგენილი წესით, გავითვალისწინებ იუსტიციის უმაღლესი საბჭოს მიერ მოპოვებული ინფორმაცია და კანდიდატის საჯარო მოსმენის პროცესში გამოვლენილი გარემოებები.

კანდიდატის შეფასება კეთილსინდისიერების კრიტერიუმით:

ა). პიროვნული კეთილსინდისიერება და პროფესიული სინდისი - მითითებული მახასიათებლების შემოწმებისას გათვალისწინებულია კანდიდატის, როგორც მოქალაქის პატიოსნება, კეთილსინდისიერება, მოვალეობებისა და პასუხისმგებლობის შესაბამისი შეგნება, გამჭვირვალობა, კორექტულობა და სხვ. კანდიდატთან საქმიან ურთიერთობაში მყოფი პირების შეფასებით ლაშა ქოჩიაშვილი არის პატიოსანი და კეთილსინდისიერი პიროვნება, რომელიც მის მიერ შესასრულებელ სამუშაოს ეკიდება მაღალი პასუხისმგებლობითა და გულისხმიერებით.

ლაშა ქოჩიაშვილს აქვს დადებითი საკრედიტო ისტორია, სახელმწიფო ბიუჯეტის მიმართ არ ერიცხება დავალიანება, დროულად აქვს გადახდილი საგზაო მოძრაობის წესების დარღვევისთვის დაკისრებული ჯარიმები.

ბ). დამოუკიდებლობა, მიუკერძოებლობა და სამართლიანობა - კანდიდატთან საქმიან ურთიერთობაში მყოფი პირების შეფასებით, ლაშა ქოჩიაშვილი არის დამოუკიდებელი, მიუკერძოებელი, პრინციპული მოსამართლე, რომელსაც ნებისმიერი საკითხის განხილვისას აქვს ნეიტრალურობის შენარჩუნების უნარი. ერთ-ერთი რეკომენდატორი აღნიშნავს, რომ კანდიდატი არის მიუკერძოებელი პოლიტიკური თუ სხვა ნიშნით.

ლაშა ქოჩიაშვილი არასდროს ყოფილა პოლიტიკური პარტიის წევრი/მხარდამჭერი ან შემომწირველი. ამასთან, არ არსებობს მტკიცებულება, რომ გადაწყვეტილების გამოტანისას მოსამართლე არ იყო დამოუკიდებელი.

გ). პიროვნული და პროფესიული ქცევა - კანდიდატთან საქმიან ურთიერთობაში მყოფი პირების შეფასებით, ლაშა ქოჩიაშვილი კორექტული, თავდაჭერილი და გაწონასწორებული პიროვნებაა, რომელსაც აქვს მოსამართლის მაღალი წოდების შესაბამისი ქცევა. ერთ-ერთი რეკომენდატორის მითითებით, კანდიდატი სამოსამართლო საქმიანობის განხორციელებისას იცავს ეთიკურ ნორმებს.

კანდიდატის თაობაზე მოძიებული ინფორმაციით დგინდება, რომ ლაშა ქოჩიაშვილის მიმართ დისციპლინური ან/და სისხლისსამართლებრივი დევნა არ დაწყებულა. კანდიდატი სასამართლო დავაში მხარედ წარმოდგენილი არ ყოფილა. ამასთან, ლაშა ქოჩიაშვილი ცნობილი იქნა დაზარალებულად 2006 წელს საქართველოს სსკ 177-ე მუხლის I ნაწილით გათვალისწინებულ დანაშაულთან დაკავშირებით. აღნიშნულ საქმეზე დადგა განაჩენი.

დ). პიროვნული და პროფესიული რეპუტაცია - კანდიდატთან საქმიან ურთიერთობაში მყოფი პირები ლაშა ქოჩიაშვილს ახასიათებენ მაღალი პიროვნული და პროფესიული რეპუტაციის მქონე პიროვნებად. კოლეგები აღნიშნავენ, რომ კანდიდატი სარგებლობს პატივისცემით როგორც სასამართლო აპარატსა და კოლეგებში, ასევე, ზოგადად, იურიდიულ წრეებში.

ე). ფინანსური ვალდებულება - კანდიდატს აქვს დადებითი საკრედიტო ისტორია, სახელმწიფო ბიუჯეტის მიმართ არ ერიცხება დავალიანება, დროულად აქვს გადახდილი საგზაო მოძრაობის წესების დარღვევისთვის დაკისრებული ჯარიმები.

ლაშა ქოჩიაშვილი ჯეროვნად და კეთილსინდისიერად ასრულებს ფინანსურ ვალდებულებებს. მოძიებული ინფორმაციის თანახმად, არ არსებობს შეუსაბამო მის შემოსავალს, ფინანსურ ვალდებულებებსა და მის საკუთრებაში არსებულ ქონებას შორის.

კანდიდატის საჯარო მოსმენის პროცესსა და მასზე მოპოვებულ მასალებში არ ყოფილა გამოვლენილი კონკრეტული გარემოებები, რაც კეთილსინდისიერების კრიტერიუმით კანდიდატის უარყოფითად შეფასების საფუძველი იქნებოდა, ამიტომ მივიჩნევ, რომ კანდიდატი სრულად აკმაყოფილებს კეთილსინდისიერების კრიტერიუმს.

კანდიდატის შეფასება კომპეტენტურობის კრიტერიუმით:

სამართლის ნორმების ცოდნა: ლაშა ქოჩიაშვილმა საჯარო მოსმენისას გამოავლინა მატერიალური და საპროცესო სამართლის ცოდნა. კანდიდატმა ისაუბრა

მოსამართლის მიმართ გამოხატვის თავისუფლების თავისებურებებზე, სამოქალაქო საპროცესო კანონმდებლობაში არსებულ ხარვეზებსა და აღნიშნული ხარვეზების გამოსწორების მისეულ ხედვებზე, ევროპული კონვენციის მე-14 მუხლისა და მე-12 დამატებითი ოქმის ურთიერთმიმართებაზე, ევროპული კონვენციის მე-8 მუხლით დაცულ სფეროზე, ადამიანის უფლებების დაცვის მიმართულებით არსებულ საერთაშორისო სამართლებრივ ინსტრუმენტებზე, გონივრული მისადაგებისა და უნივერსალური დიზაინის არსზე, საინტერესო იყო მსჯელობა კომპანიის გაკოტრებისას თავდების პასუხისმგებლობასთან დაკავშირებით. მიუხედავად ამისა, გამოვლინდა ნაკლოვანებებიც: კანდიდატის განმარტებები და მსჯელობა სამართლებრივ და სოციალურ სახელმწიფოსთან დაკავშირებით, აგრეთვე, უდანაშაულობის პრეზუმფციისა და ცილისწამების ურთიერთმიმართებაზე, არ იყო დამაკმაყოფილებელი.

აღსანიშნავია, რომ კანდიდატი არის მოქმედი მოსამართლე და სამოსამართლო უფლებამოსილებას ახორციელებს თბილისის სააპელაციო სასამართლოს სამოქალაქო საქმეთა პალატაში. კანდიდატმა წარმოადგინა მის მიერ განხილულ საქმეებზე მიღებული გადაწყვეტილებები, რომელთა გაცნობის შემდეგ შემიძლია დავასკვნა, რომ კანდიდატი სწორად იყენებს და განმარტავს სამართლის ნორმებს. საჯარო მოსმენის პროცესიდან ირკვევა, რომ კანდიდატი ეცნობა საკანონმდებლო ცვლილებებს, ეროვნულ თუ საერთაშორისო სასამართლო პრაქტიკას.

**სამართლებრივი დასაბუთების უნარი და კომპეტენცია:** კანდიდატის მიერ წარმოდგენილ გადაწყვეტილებებში მსჯელობა დასაბუთებული, ლოგიკური და თანმიმდევრულია. მისი გაცნობის შედეგად დგინდება, რომ დაცულია სამართლიანი სასამართლოს ისეთი აუცილებელი ელემენტი, როგორც არის დასაბუთებული გადაწყვეტილება. ერთ-ერთი რეკომენდატორის მითითებით, ლაშა ქოჩიაშვილს აქვს სამართლებრივი საკითხების ღრმა და ჯეროვანი გააზრების, გადაწყვეტილებების ფაქტობრივ-სამართლებრივი თვალსაზრისით დასაბუთების, მსჯელობის ლოგიკური გადმოცემის უნარი. აღსანიშნავია, რომ ლაშა ქოჩიაშვილის გასაჩივრებულ გადაწყვეტილებათა სტაბილურობის მაჩვენებელი შეადგენს 81.4%-ს.

საჯარო მოსმენის დროს ლაშა ქოჩიაშვილმა იმსჯელა სხვადასხვა სამართლებრივ საკითხზე, მათ შორის ქონების სამართლიანი და საბაზრო ფასით გასხვისების, სსკ-ის 1455-ე მუხლის ნორმატიული შინაარსის არაკონსტიტუციურად ცნობის საკითხზე და სხვ. კანდიდატმა გაიხსენა საარბიტრაჟო დავაში მესამე პირის ჩართვის შესახებ მიღებული გადაწყვეტილება, რის შესაძლებლობასაც კანონი არ ითვალისწინებდა და აღნიშნული გადაწყვეტილება გაზიარებულ იქნა საკასაციო სასამართლოს მიერ.

მიუხედავად იმისა, რომ კანდიდატმა მსჯელობისას გამოავლინა კომპეტენცია, საკონსტიტუციო სამართლის მიმართულებით დასმულ შეკითხვებზე პასუხები არ იყო სრულფასოვანი (მაგალითად, წარმომადგენლის მეშვეობით არჩევნებში მონაწილეობის დაუშვებლობის საკითხზე).

**წერის უნარი:** ლაშა ქოჩიაშვილმა წარმოადგინა 6 სასამართლო გადაწყვეტილება, მათ შორის იჯარის ხელშეკრულების ბათილად ცნობის, პარტნიორთა კრების ოქმის ბათილად ცნობის, კომპენსაციის გადახდის სანაცვლოდ საცხოვრებელი სადგომის საკუთრებაში გადაცემის შესახებ და სხვ. კანდიდატის მიერ წარმოდგენილი დოკუმენტების გაცნობის შედეგად შემიძლია დავასკვნა, რომ ლაშა ქოჩიაშვილი აზრს გადმოსცემს ნათლად და გასაგებად, სამართლებრივ დოკუმენტებს არ ტვირთავს არამიზნობრივი და შაბლონური მსჯელობით. რეკომენდატორები უთითებენ, რომ კანდიდატის მიერ მიღებული სასამართლო გადაწყვეტილებები სამართლებრივად დასაბუთებული, ხოლო სტილისტურად და გრამატიკულად გამართულია. ამასთან, სასამართლო გადაწყვეტილებების გარდა კანდიდატს არ წარმოუდგენია სხვა სახის სამართლებრივი ნაშრომი (სტატია, მონოგრაფია), რაც მომცემდა შესაძლებლობას უკეთ შემეფასებინა წერის უნარი.

**ზეპირი კომუნიკაციის უნარი:** კანდიდატთან საქმიან ურთიერთობაში მყოფი პირები უთითებენ, რომ ლაშა ქოჩიაშვილს ზეპირი კომუნიკაციისას ახასიათებს აზრის ნათლად, მოკლედ, ლოგიკური თანმიმდევრულობით და დამაჯერებლად ჩამოყალიბების უნარი. კანდიდატმა საჯარო მოსმენის პროცესზე გამოავლინა გამართულად და მკაფიოდ მეტყველების უნარი. კანდიდატი საუბრობს მშვიდად, გაწონასწორებულად, აზრს გადმოსცემს ნათლად.

**პროფესიული თვისებები, მათ შორის, ქცევა სასამართლო დარბაზში:** კანდიდატთან საქმიან ურთიერთობაში მყოფი პირები ლაშა ქოჩიაშვილს ახასიათებენ როგორც შრომისმოყვარე და ორგანიზებულ პიროვნებას, რომელსაც შესწევს უნარი ეფექტურად დაგეგმოს სამუშაო განრიგი, განახორციელოს სასამართლო პროცესის ორგანიზება, წარმართოს სხდომის მდივნისა და თანაშემწის საქმიანობა, ეფექტურად მართოს საქმეთა ნაკადი. ერთ-ერთი რეკომენდატორი აღნიშნავს, რომ კანდიდატი ყოველთვის სრულყოფილად ფლობს ინფორმაციას საქმეში არსებულ მასალებთან დაკავშირებით, რის გამოც სასამართლო სხდომის დარბაზში მხარეებთან განსაკუთრებული კომუნიკაციის უნარით გამოირჩევა.

იუსტიციის უმაღლესი საბჭოს სასამართლო მენეჯმენტის დეპარტამენტის მიერ დამუშავებული სტატისტიკური მონაცემების თანახმად, ლაშა ქოჩიაშვილს

საანგარიშო პერიოდში (1003 დღე) დასრულებული აქვს 311 საქმე, დღეში საშუალოდ 0.3 საქმემდე. ამასთან, კანდიდატის მიერ კანონმდებლობით დადგენილ ვადებში საქმეთა განხილვის მაჩვენებელი 93.5%-ს, ხოლო გადაწყვეტილების მომზადების მაჩვენებელი 97.4%-ს აღწევს, რაც მიუთითებს კანდიდატის შრომისმოყვარეობასა და დროის სწორად განაწილების უნარზე.

**აკადემიური მიღწევები და პროფესიული წვრთნა:** კანდიდატს მონაწილეობა აქვს მიღებული სასამართლო სისტემისა და მართლმსაჯულების საკითხებზე გამართულ 14-ზე მეტ ღონისძიებაში, მათ შორისაა სემინარები ადმინისტრაციულ სამართალში ერთგვაროვანი პრაქტიკის ჩამოყალიბების, სასამართლო პროცესზე კომუნიკაციის სტანდარტების, რელაციის მეთოდის, გადაწყვეტილების სტრუქტურისა და დასაბუთების, გაკოტრების სამართლის, გადახდისუუნარობის მენეჯმენტის შესახებ და სხვ.

**პროფესიული აქტივობა:** პროფესიული აქტივობის თაობაზე მოძიებული ინფორმაციის თანახმად, კანდიდატი ეწევა პედაგოგიურ მოღვაწეობას, კერძოდ ლაშა ქოჩიაშვილი არის იუსტიციის უმაღლესი სკოლის ლექტორი. იგი ასევე არის იუსტიციის სასწავლო ცენტრის ტრენერი.

კანდიდატის შემაჯამებელი შეფასება:

1. ლაშა ქოჩიაშვილი სრულად აკმაყოფილებს კეთილსინდისიერების კრიტერიუმს.
2. კომპეტენტურობის კრიტერიუმით კანდიდატს ვაფასებ 85 ქულით, კერძოდ:
  - 2.1.სამართლის ნორმების ცოდნა - 17 ქულა;
  - 2.2.სამართლებრივი დასაბუთების უნარი და კომპეტენცია - 16 ქულა;
  - 2.3.წერის უნარი - 16 ქულა;
  - 2.4.ზეპირი კომუნიკაციის უნარი - 14 ქულა;
  - 2.5.პროფესიული თვისებები, მათ შორის ქცევა სასამართლო დარბაზში - 14 ქულა;
  - 2.6.აკადემიური მიღწევები და პროფესიული წვრთნა - 4 ქულა;
  - 2.7.პროფესიული აქტივობა - 4 ქულა.

ირმა გელაშვილი

*ი. გელაშვილი*

იუსტიციის უმაღლესი საბჭოს წევრი

თარიღი:

*28.05.2024*